

Aldenardam, & hinc Gandavum, ubi recepto Livia simul & Lisa fluviis, Teneramundam ingreditur, & recepto hic Tenera, sinistro cornu prætervehitur Rupelmundam, moxque auctior factus magnificam, splendidamque Antverpiam, qua in longum oræ ejus adjacet, lambit. Quam prætervectus, alluensque arces hinc in Flandriæ, illinc in Brabantia ripa exstructas; in duos se amnes facto divergio dividit: quorum alter assumpto *Hontæ* nomine, inter Flandriæ Slusam, & Walachriam Zelandiæ insulam, in Oceanum excurrit; alter ad Septentrionem deflectens, & Bergezomium eminens præterlapsus, Zelandiæ insulas variis veluti brachiis interstinguit, & in Orientalem partem *Beoosterfeldt* dictam, & Occidentalem *Bewesterfeldt*, partitur, inter quas ad Oceanum porro contendens, amisso inter Scaldiam & Walachriam nomine, eidem se miscet.

*Amasis.* *Amasis* primordia sua ex Westphalia arcèssit, circa pagum, cui nomen est Viedeburgum, & in Caurum statim contendens, præterlabitur Varendorpium. Hinc Monasterio urbi factus vicinior Greviam, Rhenam, Elbergam, & Lingam, Meppam, Hessopium, Haram, Langium, Berselium, Scarpenbergam, Reidam, Bachbantium, Metelinum, aliaque loca prætervectus, Iemercum tandem allabitur, locum clade Comitis Ludovici Nassovii celebratum, unde ad Occasum conversus magnum efficit lacum, ad cujus dexteram situm est oppidum Embda, supra quod immenso ore in Oceanum Septentrionalem effunditur.

*Mosella.* *Mosella* (ut de minoribus fluviis dicam) haud procul Basilea oritur, inter montes Vogesum & Novi Castris. Lotharingiam interfecans Metim adit, inde permeans Luceburgensem regionem, Theonvillam lustrat, donec Treveros prætervectus, tandemque amplior violentiorque factus ad Confluentes, *Coblentis* vocant, Rheno se abdit. *Isala* in confinis Clivæ ortus, prope Duisburgum fossam Drusianam recipit, & porro Zutphaniam, Daventriam, Campas alluens, in lacum Flevum excurrit.

*Lisa.* *Lisa* in Artesia nascitur ad Lisburgum pagum, cui nomen suum impertit, haud procul à Terovana, & Ariam oppidum præteriens, Armenterium, Virovicum, Menemium alluit, hinc Cortracum fere medium scindit, & Deiniam præterlapsus Gandavum ingreditur, ubi in Scaldim effunditur, vario laudabilium piscium genere nobilis. *Aa* nascitur in finibus Morinorum & Fanum S. Audomari alluens Gravelingam contendit, ubi in Oceanum effunditur.

*Dilia.* *Dilia* Lovanium & Mechliniam irrigat, tandemque in Scaldim exit. *Desa* in terra Leodicensi ortus Buscumducis adit, inde Mosæ permiscetur.

*Demera.* *Demera* prope Tungros ortus, Bilsam, & Hasselam transit, & deinceps Diesthemium, Sichemium, & Areschothum pervagatus *Dilia* se permiscet. *Vidrus*, Belgice *de Vecht*, nascitur in Westphalia, & interfluit Comitatum Benthemiensem, Hardenbergam, Ommam, & tandem

Belgica.

Hasselium alluens in Flevum excurrit. *Scarpa* *Scarpa*. duplici fonte in Artesia ortus, utrumque torrentem mox permiscens integer Atrebatum pervenit, longoque mox cursu Duacum aliasque urbes adiens Scaldi absorbetur.

Habet præterea hæc regio silvas & nemora. *Silva.* *Arduennam* silvam hic statuit C. Cæsar, quam idem tradidit à Rheno fluvio per fines Trevirorum ad Nervios & initium Rhemorum pertinere, & millibus passuum amplius D patere in longitudinem, attingere Menapios, Eburones, Advaticos, usque ad Scaldim. Hæc nostro tempore multo est minor; neque 90 milliaria exsuperat.

*Mormantium.* *Mormantium*, amplissima simul & amœnissima Hannoniæ Comitatus silva, initium capit circa *Quiesnoy*, & in Austrum ad multas leucas Veromanduos versus procurrit. Plurimi hic conficiuntur carbones, unde creditur à quibusdam veteris Carbonariæ pars.

Amœnissima *D. Amandi Silva*, in eadem Hannonia sita, à Flandriæ Gallicanæ confiniis, Valentianas usque porrigitur.

Est in eodem Hannoniæ comitatu & *Fagniacensis Silva*, nomen hæcenus retinens, licet aliquatenus depravatum, à Faunis & Satyris, quos in hoc fortean tractu somniarunt Poëtæ capripedes & cornigeros, quod videlicet primi horum saltuum habitatores ea fuerint morum feritate, ut ad brutas quodammodo pecudes viderentur accedere.

*Soniensis*, vel *Sogniacensis Silva*, in Brabantia, prope Bruxellam, continet octies mille jugera, sive septem leucarum spatium. Complectitur pagos aliquot, tum & arcem, quam trium fontium vocant, & abbatias cœnobique complura, quæ à Bruxellensibus non minori devotione, quam animi solatio visuntur.

Sunt & in eadem Brabantia *Meerdalia*, Lovaniensi urbi vicina, *Zaventerloa*, & *Grootenbouthium*, saltus nec amœnitate minus, quam ferarum frequentia celebres.

*Marliana*, agri Namurcensis silva, à Namurci arce ad Mosæ usque ripam superbo sanè ac amœno aspectu procurrit.

*Niepa*, Flandriæ saltus longe præcipuus, haud procul Arthesiæ finibus, flumini Lisæ propinquus est. Silva ingens, amœna, antiqua, & in qua arx situ valida.

*Nonna*, Flandriæ item silva, Ipris vicina, ingenti magnitudine in septentriones extenditur, multos pagos & abbatias complexa.

*Poodsbergia* inter Flandriæ Hannoniæque confinia, magnus & orbiculari fere figura saltus est.

*Buscum-Guilielmi* Arthesiæ prope Rentejum silva est, in qua semi-prælium illud inter Imperatorem & Galliarum regem, anno 1554 commissum.

*Echterswaldia*, pulchra simul & peramœna Geldriæ ad Arnhemum silva, boream versus procurrit.

B 2

Seven-